



mjesečni Bilten



maj
svibanj
2023.
288

omladinska mreža bosne i hercegovine
ISSN 2831 - 0845

Dragi prijatelji/ce,

Predstavljamo vam majsko izdanje (broj 288) mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine.

Bilten izlazi na bosanskom-crnogorsko-hrvatsko-srpskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.orctuzla.ba



SADRŽAJ

Aktivnosti u maju.....	2
Planovi za juni.....	7
Aktivnosti članova mreže.....	8
Saopštenja/informacije/donatori/pozivi	16

Uživajte u čitanju!

AKTIVNOSTI ORC/HCA U MAJU



Omladinska konferencija „Izgradnja mira i sigurnosti“, Sarajevo, 25. – 26. maj 2023.

Završena je nevjerovatna konferencija o izgradnji mira i sigurnosti koju je organizovao Omladinski resursni centar Tuzla/CAT Bosna i Hercegovina u Parlamentarnoj skupštini za preko 50 mladih ljudi iz cijele Bosne i Hercegovine.

Konferencija je održana u Sarajevu, 25. – 26. Maja, a pod pokroviteljstvom NATO Odjela za javnu diplomatiju Brisel, te uz podršku Parlamentarne Skupštine BiH. Na konferenciji je učestvovalo više od 50 mladih iz više gradova BiH.



Tokom dva dana konferencije, mladi su imali priliku čuti zapanjujuće govore, učestvovati u zanimljivim raspravama te se povezati s nevjerovatnim ljudima koji dijele istu strast za izgradnjom mira. Bila je to prava platforma za razmjenu ideja, stvaranje novih partnerstava i pokretanje promjena.

Osim ozbiljnog rada, imali smo i trenutke za opuštanje i zabavu, a mladi su prvi dan učestvovali u interaktivnim radionicama na kojima su definisali najveće trenutne prepreke za mir i stabilnost u Bosni i Hercegovini, te postavljali rješenja – mišljenje mladih kako bi se aktivno mogli uključiti u rješavanje pojedinih problema.

Konferencija "Izgradnja mira i sigurnosti" će ostati u sjećanju kao iskustvo koje je nadahnulo i potaknulo mlade na daljnje djelovanje.

Hvala svima koji su učestvovali i doprinijeli uspjehu ove konferencije. Neka naša vizija mira i sigurnosti ostane živa i neka naše djelovanje stvara pozitivne promjene u svijetu.

Zahvaljujemo se i govornicima koji su odvojili vrijeme kako bi razgovarali sa mladima, odgovarali na njihova pitanja, diskutovali: **NEJRA VELJAN** – Atlantska inicijativa, **SANJA DALAR** – Agencija za ravnopravnost spolova BiH, **LARA SUTOVIĆ** – Ja BiH u EU, **SATKA HAJDARPAŠIĆ** – Ambasada Crne Gore u BiH i **HAJRUDIN SOLAK** – IOM BHRI Sarajevo.



This project
is sponsored by
the North Atlantic
Treaty Organization



CAT Bosna i Hercegovina

Tokom mjeseca maja, nastavili smo sa našim redovnim aktivnostima u sklopu projekta „CAT – Bosna i Hercegovina“.

Naše mačke su nastavile da oduševljavaju javnost na društvenim mrežama sa mnogo meme-ova, poziva na seminare, pozitivnih priča o mladima iz Bosna i Hercegovine.

Ukoliko još uvijek ne pratite naše mačke – pozivamo vas da to učinite na:

[Facebook](#), [Web Portal](#), [Instagram](#) i [Youtube kanal](#).



HUB – za digitalnu sigurnost

Nakon završenih 5 modula Akademije Hub za digitalnu sigurnost održana je svečana konferencija u organizaciji Udruženje JaBiHEU, na kojoj je jedna od panelistica bila **Mirela Biković**, mentorica na pomenutom projektu.

Ambasador Kraljevine Nizozemske u BiH, Jan Waltmans je kazao da u savremenom dobu mediji i društveni mediji generiraju ogromne količine informacija i ljudi koji te informacije čitaju nisu u stanju razlučiti šta je od toga istina, a šta ne. Po njegovim riječima, jako je važno da mediji i novinari imaju slobodu da traže informacije, naročito od vlasti i da iznose različita mišljenja i interpretacije šta je važno, a šta ne.



Također je važno da mladi ljudi znaju razmišljati o onome što vide u medijima, zbog toga što određeni pojedinci i grupe koriste tu slobodu da plasiraju lažne informacije i siju mržnju i podjele - kazao je ambasador Waltmans.



CAT BiH i RTVTK – „Aktiviraj se!“

Ovog mjeseca smo se družili sa mladima iz Udruženja za zaštitu životinja „Nirina“ i Udruženje GirlThing Tuzla, te smo pričali o njihovim odsadašnjim aktivnostima u skopu naše nove rubrike na RTV TK pod nazivom "Aktiviraj se!".



Sve dosadašnje emisije možete pogledati klikom [ovdje](#).

Ovaj sadržaj se realizuje kroz **Bosnia and Herzegovina Resilience Initiative (BHRI)**, projekat kojeg implementira **Međunarodna organizacija za migracije (IOM)**, a finansira **Austrijska razvojna saradnja**.



PRESPA forum za dijalog – Panel „Road to 2030“ Skopje



Na poziv Ministarstva vanjskih poslova Sjeverne Makedonije, direktor ORC Tuzla i nacionalni koordinator ALF BiH, Miralem Tursinović boravio je, od 7. do 9. maja u Skopju, gdje je učestvovao na Panel diskusiji „Put za 2030“.

Panel je organizovan od strane Ministarstva vanjskih poslova Sjeverne Makedonije, kao pripremni događaj za PRESPA Forum za dijalog, koji će biti

održan u Strugi, 15. i 16. juna ove godine.

Tokom izlaganja, ali i u bilateralnim susretima sa predstavnicima Ministarstva, nevladinih organizacija iz regiona, te predstavnicima međunarodnih organizacija i ambasada, koji su prisustvovali panelu, Miralem Tursinović je između ostalog istakao i važnost imrežavanja, kao i razmjene kulture i dijaloga među zemljama na Zapadnom Balkanu.

Proces proširenja EU, iz perspektive zemalja kandidata/pristupnica EU, označio je određene korake naprijed. Sjeverna Makedonija i Albanija su otvorile pristupne pregovore, dok su Bosna i Hercegovina, Ukrajina i Moldavija dobile status kandidata. Međutim, uprkos ovim pozitivnim pomacima, još uvijek postoje mnoge prepreke na neravnom putu do Brisela.



S obzirom na ove složene i nepredvidive okolnosti, Ministarstvo vanjskih poslova Sjeverne Makedonije priprema treće izdanje Prespanskog foruma Dijalog 2023 (PFD2023) pod nazivom „Proširena evropska porodica do 2030: misija (ne)moguća?“ koji će se održati 15. i 16. juna 2023. godine u Strugi, živopisnom gradu na obali Ohridskog jezera.

Slijedeći ustaljenu tradiciju, Ministarstvo vanjskih poslova organizovalo je, kao preteču PFD2023, predgodađaj pod nazivom „Put do 2030.“, čiji je cilj razmjena analitičkih misli i ideja koje bi poslužile kao vrijedan doprinos za sjednicu i panel diskusije o PFD2023.

Više o Prespa Fournu na: <https://www.facebook.com/PrespaForum>



Trening za trenere Podgorica, Crna Gora



Na dvodnevnom događaju u Podgorici sa mladima iz Sjeverne Makedonije, Srbije, Bosne i Hercegovine i Crne Gore ičešće su uzeli i naši članovi Suzana Dušanić i Ammar Grabić.

Na događaju su učesnici imali priliku raditi na završnom modulu vođenja interkulturalnih radionica, u okviru programa "Trening za trenere u oblasti medijske pismenosti i interkulturalnog dijaloga." Organizator događaja je Forum MNE.

REDOVNE AKTIVNOSTI ORC I HCA TUZLA

Tokom maja smo radili na održavanju i razvoju komunikacija i koordinacije unutar Omladinske mreže Bosne i Hercegovine (www.orctuzla.ba). U okviru toga smo svakodnevno na mejling listu mreže (omladina@orctuzla.ba), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA JUNI 2023.



Nastavak ostalih aktivnosti u okviru projekta CATNet.

Ovaj projekat je realiziran zahvaljujući podršci **Bosnia and Herzegovina Resilience Initiative (BHRI)**, projekat kojeg implementira **Međunarodna organizacija za migracije (IOM)**, a kojeg finansira **Austrijska razvojna saradnja.**



Pripreme za organizovanje ALTYO treninga u Strugi – Sjeverna Makedonija. U okviru ovoga 10 mladih iz Bosne i Hercegovine će imati priliku učestvovati na treningu i steći nova znanja, ali i ALTYO certifikat.



Početak implemenacije projekta "**Moj zeleni otisak**", podržanog od strane **Fondacije Tuzlanske Zajednice (FTZ)**. O aktivnostima u projektu bićete pravovremeno obaviješteni u našim glasilima.

AKTIVNOSTI ČLANICA OMLADINSKE MREŽE BiH



Udruženje za društvena istraživanja i komunikacije - UDIK
Ul. Grbavička 51, 71000 Sarajevo
Tel./fax: +387 33 978 600; +387 33 978 605
E-mail: official.udik@outlook.com
official.udik.brcko@outlook.com
Web: www.udik.org; www.udik-brcko.org



Izložba i okrugli sto u Brčkom

Udruženje za društvena istraživanja i komunikacije (UDIK) i Forum Civilna mirovna služba u Bosni i Hercegovini (forumZFD BiH) organizovali su u ponedjeljak 22. maja okrugli sto u Brčkom pod nazivom „Izazovi memorijalizacije u suočavanju s prošlošću“. Panelisti na okruglom stolu bili su **fra Petar Matanović** – Franjevački samostan Dubrave, **Radmila Žigić** – Inicijativa Mir sa ženskim licem i Fondacija Lara iz Bijeljine, politolog **Čazim Suljević** i studentica politologije, međunarodnih odnosa i diplomatije **Edna Mulić**. Diskusiju je moderirala novinarka **Alma Kajević**. Tokom okruglog stola bila je prikazana i izložba idejnih rješenja svih arhitekata koji su učestvovali na konkursu Grada Sarajeva za izradu idejnog rješenja spomen-obilježja na Kazanima nadomak Sarajeva.



Građanska inicijativa za sjećanje i komemoracije



GISK

Kako bi nastavio promovisati aktivnu ulogu mladih u društvu, kao i važnost saradnje vladinog i nevladinog sektora, UDIK je pokrenuo mrežu pod nazivom Građanska inicijativa za sjećanje i komemoracije (GISK). Cilj ove inicijative jeste zajednički građanski i politički angažman u kulturi sjećanja, povećanje društvene kohezije i raznolikosti u Bosni i Hercegovini. Budite dio naše inicijative i svojim angažmanom doprinesite boljem suživotu u svojoj sredini. Prijave šalžite na e-mail: prijava.gisk@gmail.com.

U maju je UDIK organizovao nekoliko radnih sastanaka sa trenutnim članovima GISK mreže i stručnjacima na projektu. Na sastancima su donesene odluke o prijemu novih članova mreže.

**OMLADINSKA ORGANIZACIJA "SVITAC"**

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.netWeb: www.svitac.orgFB: www.facebook.com/omladinska.svitac**Dnevne radionice**

Omladinska organizacija Svitar je nastavila sa svakodnevnim interaktivnim i online aktivnostima. Mlađi učesnici su radili kreativne i edukativne stvari prilagođene uzrastu, uz pomoć lokalnih i međunarodnih volontera. Ovaj mjesec su razgovarali o domaćim životinjama, gljivama, proljeću, insektima, leptirima i pčelama. Učesnici su uživali u pravljenju leptira, karnevalskih čaša, malih pilića i šarenih gljiva. Nastavili su i sa muzičkim radionicama, uvježbavanjem ritmova i pjesme o lisici i visibabi. Nastavili su sa abecedom i naučili da pišu slova P, R, S, Š, T, U. Radili su vježbe

zagrijavanja i jogu za djecu, a svakog su četvrtka plesali, bavili se sportom i vježbali čitanje i slušanje priča. Cilj ovih edukativnih aktivnosti je da djeca razviju maštu i da koristeći razne materijale izraze svoju kreativnost, te da razviju motoriku, pamćenje, osjećaj tolerancije i poštovanje prema drugima i usvoje lijepo ponašanje. Sve radionice su implementirane uz edukativnu vizuelnu metodu sa slikama i videom.



Uzrast 13+ je učestvovao u diskusijama/radionicama na teme: lažne vijesti, kapitalizam, sreća, minimalizam, konzumerizam, životna sredina. Na ovaj način želimo mladima pružiti siguran i neutralan prostor, u kojem mogu reći svoje mišljenje.

Na engleskim i njemačkim radionicama su učili korištenje priloških odredbi za mjesto i vrijeme, ponavljali vokabular iz prošlih mjeseci i glagole u sadašnjem i prošlom vremenu, pisali diktate, čitali i prevodili kratke tekstove i fraze, radili na vježbanju svakodnevne komunikacije i gramatike, učili novi vokabular, te radili na zanimljivim prezentacijama i projektima.



Radionice gitare

U okviru novih pjesama, etida i kompozicija na kojima su učesnici radili nalaze se: "Capriccio br. 23, 24, 25 i 26" (L.Legnani), "Dvije etide u C-duru" (M.Carrcasi), "Napoleonov plač" (J. Szabo) i "Yesterday" (Beatles).



Radionice sambe

Grupa je radila na dvije nove kompozicije: Relict i Neboskop. Prva je poprilično "straight-forward" rock u E molu, dok je druga nešto ritmički komplikovanija. Počinje u 4/4 mjeri, prelazi u 11/8 i završava u 12/8.



Međunarodni dan porodice

Ujedinjene nacije su se počele fokusirati na pitanja koja se odnose na porodicu 1980-ih godina, a od tada se 15. maja obilježava Međunarodni dan porodice.

U Omladinskoj organizaciji Svitac smo održali radionicu sa djecom na temu porodica kao i o važnosti da imamo sigurno mjesto u koje uvijek možemo doći. Koristili smo ram za slike sa simbolima kao tehniku za

crtanje članova porodice. Napravili smo i prekrasan poster sa ključnim riječima i simbolima kao što su podrška, sreća, ljubav, dom i sigurnost. Dijelevi ove informacije i zajednički razgovarajući o njima, učesnici su razmijenili znanja i osjećaje o svojim porodicama i razgovarali o važnosti porodice.



Svjetski dan kulturne raznolikosti za dijalog i razvoj

Ujedinjene nacije proglasile su Svjetski dan kulturne raznolikosti za dijalog i razvoj kako bi proslavile bogatstvo svjetskih kultura i suštinsku ulogu interkulturalnog dijaloga u postizanju mira i održivog razvoja. Omladinska organizacija Svitač je obilježila ovaj dan sa svojim učesnicima. Sa našim najmlađima smo razgovarali o razlikama kultura u hrani, odjeći, plesu i znakovnom jeziku. Naša volonterka iz Turske, Zeliha, je pokazala par riječi na turskom znakovnom jeziku, a učesnici su se zabavili vježbajući ih. Takođe smo sa njima razgovarali o kontinentima, te različitim životinjama i običajima. Napravili smo baner sa zastavicama iz različitih zemalja i plakat sa životinjama.

Sa učesnicima 16+ smo podijelili hranu koju je svako donio od kuće i domaći sok od ružinog cvijeta, koji je tipičan za ovaj dio godine u BiH. I ova grupa je napravila plakat na temu šta je kultura, dijalog i različitost.

Za juni se planira nastavak svih aktivnosti Omladinske organizacije Svitač.

Institut za
razvoj mladih KULT



4th Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org,

web: www.mladi.org



Uspješna narandžasta saradnja – fotografijama, filmom i panel diskusijom poslana snažna poruka mladima

Saradnja Instituta za razvoj mladih KULT i Gimnazije Dobrinja rezultirala je zanimljivim aktivnostima u sklopu obilježavanja Narandžastog dana. Institut već skoro deceniju, svakog 25. u mjesecu obilježava Narandžasti dan, dan borbe protiv nasilja nad ženama i djevojčicama, s ciljem slanja poruka podrške žrtvama i podizanja svijesti o rodnoj ravnopravnosti.



Učenici Gimnazije Dobrinja uz mentorstvo profesorice Aide Hasović, prvenstveno su izradili i podijelili na društvenim mrežama fotografije posvećene Narandžastom danu, te tako na kreativan način odlučili skrenuti pažnju svojim vršnjacima na ovaj, vrlo rasprostranjen problem. Dan poslije, u prostorijama ove škole, prikazan je kratki video o Cyberbullyingu, nakon toga film "Bez glasa", te je održana i panel diskusija.

Jedna od panelistkinja bila je i Zorana

Tovilović iz Instituta za razvoj mladih KULT. Zorana je mladima rekla nešto više o važnosti i obilježavanju Narandžastog dana u Institutu, te informirala prisutne na koji način se mogu uključiti u aktivnosti koje svakog mjeseca organizira Institut.

Da nasilje nije problem pojedinca nego cijele društvene zajednice, te da je za nasilje odgovoran isključivo počinitelj, dodale su učesnice panela Munevera Hodžić - Lemeš, menadžerica Sigurne kuće u Sarajevu i Jasmina Buljić, psihologinja u Sigurnoj kući.

Nakon panela, mladi su imali nekoliko pitanja za panelistkinje, te se složili da nasilje nije i ne smije biti privatna stvar i prolaziti nekažnjeno.



Institut za razvoj mladih KULT i Vijeće mladih Bosanska Krupa zajedno za stanovništvo pogođeno poplavama

Iako su nastupili sunčani dani, prirodne nepogode iz proteklog perioda su za sobom ostavile probleme s kojima se suočavaju građani Unsko-sanskog kantona. Nadležne službe su proglasile da je jedan od najpogođenijih gradova Bosanska Krupa. Štab civilne zaštite Bosanska Krupa donio je Odluku o proglašenju stanja prirodne nesreće. Također, prema izvještajima nadležnih službi, oko 900 domaćinstava

i 250 objekata bilo je potpuno izolovano i do njih se moglo doći samo čamcima. Šteta koja je nastala ovom prirodnom katastrofom izuzetno je velika.

Kako bi pomogli ugroženom stanovništvu, Institut za razvoj mladih KULT u saradnji sa Vijećem mladih Bosanska Krupa u periodu koji slijedi, podršku će pružiti najugroženijim kategorijama stanovništva kao što su stara i iznemogla lica koja potencijalno nemaju podršku porodice u ovim danima, te mladima i djeci, kako bi se oni što prije vratili svojim svakodnevnim aktivnostima. Aktivnosti će okupiti što veći broj mladih volontera koji će doprinijeti da ljudi iz poplavljenih područja u periodu sanacije štete imaju bolji i kvalitetniji život.



Institut za
razvoj mladih KULT



MLADI.ORG

Mladi volonteri će pripremati i dijeliti pakete sa hranom i sredstvima za ličnu higijenu za oko 200 ugroženih domaćinstava, posjetiti škole i uručiti učenicima pakete sa školskim priborom, te pomoći u sanaciji štete u vidu čišćenja mulja i pijeska, nasipanja dvorišta i ostalih aktivnosti koje se pokazuju kao potreba na određenim područjima. Pomoć stanovništvu podrazumijeva i obezbjeđivanje aparata za isušivanje vlage nakon što se voda povuče, a aparati će biti korišteni prema potrebi i izmješteni iz domaćinstva u domaćinstvo. Institut za razvoj mladih KULT prepoznao je značaj podrške građanima u nevolji i dodijelio 10.000 KM Vijeću mladih Bosanska Krupa, koje će provoditi ove aktivnosti.

Aktivnostima se mogu pridružiti i volonteri iz drugih gradova sa područja Unsko-sanskog kantona, a predviđena je i posjeta i boravak volontera u drugim gradovima, u svrhu što kvalitetnije provedenih aktivnosti i pružanja podrške onima kojima je najpotrebnija u ovom periodu.

EU dijalog mladih političara – Konkretnim inicijativama do doprinosa prioritetima EU za BiH

Kroz četiri generacije obuke Uči, misli i djeluj! za omladinske političke lidere (UMiDp) koju provodi Institut za razvoj mladih KULT prošlo je preko 80 mladih iz preko 15 različitih stranaka.

Događaj EU dijalog mladih političara u BiH okupio je mlade političare iz preko 12 stranaka, koji su već pohađali obuku Uči, misli i djeluj! za omladinske političke lidere i koji su spremni samostalno ili u grupi raditi na inicijativama za provedbu prioriteta EU u BiH, te na boljem položaju mladih u BiH. Svi učesnici imali su priliku dobiti više informacija o prioritetima EU za BiH i predložiti inicijative na kojima mogu raditi u periodu koji slijedi. Predložene inicijative će potencijalno podržati i Institut za razvoj mladih KULT, ali i drugi politički i društveni akteri.

Pored toga, mladi političari su na događaju razgovarali o tome šta status zemlje kandidata znači u praksi za BiH i šta konkretno znači 14 prioriteta EU za BiH. Kroz rad u grupama i grupne diskusije, mladi političari su analizirali trenutno stanje u BiH, istraživali koji od prioriteta je njima kao mladim političarima najvažniji i zašto, te na koji način pokrenuti neku inicijativu za primjenu nekog od prioriteta.

Institut za razvoj mladih KULT nastavlja podržavati mlade političare u realizacijama njihovih ideja za bolje uslove života mladih u BiH.






HO „PARTNER“ Banja Luka
Ul. Srđe Zlopogleđe 55, 78000 Banjaluka
Tel./fax: +387 51 250 730
E-mail: partner@teol.net
Web: www.hopartner.org



FILMSKI FESTIVAL „UHVATI FILM BANJA LUKA“ 2023



Humanitarna organizacija „Partner“ iz Banje Luke organizuje 12. izdanje „Uhvati film Banja Luka“ festival koji će se održati u oktobru 2023. godine u Banjoj Luci. „Uhvati film“ festival je međunarodnog karaktera i realizuje se u Novom Sadu, a zatim u Banjoj Luci, Rijeci i Kotoru sa ciljem afirmacije domaćih i inostranih igranih, dokumentarnih i animiranih filmova, čiji su akteri osobe sa invaliditetom, kao i promocije mogućnosti i izazova osoba sa invaliditetom (sa posebnim osvrtom na višestruko marginalizovane grupe) kroz umjetnost.

Na konkursu za prijem filmova, koji je bio otvoren dva mjeseca, pristiglo je 454 filmova, iz svih krajeva svijeta. Najviše filmova je prijavljeno iz Irana i Španije, dok je iz regiona pristiglo 10 filmova. Svi oni su u razmatranju selektorke, a zatim i stručnog žirija, koji će izabrati one najbolje za prikazivanje na festivalu u Banjaluci, Novom Sadu, Rijeci i Kotoru.

Pored filmskog programa prateći program „Uhvati film Banja Luka“ festivala biće *Međunarodna nedjelja djeteta u svjetlu inkluzije* a ova aktivnost ima inkluzivni karakter, što se prožima kroz cijeli festival. Zatim, panel diskusije na kojima će panelisti biti i osobe sa invaliditetom koje

su stručne za određenu oblast o kojoj je i konkretna tema, te na taj način afirmišemo znanje i iskustvo osoba sa invaliditetom a u svakom slučaju njihove potencijale.

U okviru festivala biće predstavljena izložba fotografija „Kultura dostupna svima“. Tim povodom 5. juna 2023. godine biće raspisan konkurs za prijem radova za sve zainteresovane pojedince i organizacije iz Bosne i Hercegovine, Srbije, Crne Gore i Hrvatske.

Veoma je važna uloga umjetnosti i kulture u društvu, kao i rušenje predrasuda kroz umjetnost. Prikazi iskustava života s invaliditetom kroz filmsku umjetnost, značajan je korak ka ostvarivanju jednakih prava, pristupa i odnosa sa društvom, koje se temelji na neznanju, predrasudama i strahu.

Popularizovanjem raznih manifestacija, projekata i aktivnosti, promoviše se umjetnost koju stvaraju osobe s invaliditetom, a njihov aktivizam i rad doprinose poboljšanju društvenog položaja, te na taj način motivišu i druge osobe s invaliditetom da se uključe u sve sfere društvenog života.

Dvanaesto izdanje „Uhvati film Banja Luka“ festivala održaće se od 12. do 14. oktobra 2023. godine u Banjoj Luci.

Audio-vizuelni centar Republike Srpske i Grad Banja Luka podržali su održavanje „Uhvati film Banja Luka“ festivala.

INFORMACIJE / NAJAVE / DONATORI / POZIVI

1. Prijavite se za Grant Svilenih Puteva



UNESCO poziva mlade da se prijave za Istraživački Grant Svilenih Puteva koji ima za cilj da osposobi mlade istraživače za dalje proučavanje zajedničkog nasljeđa Puteva svile.

OBLAST: religija, jezik, književnost, umjetnost, muzika, ekonomija, trgovina

OPIS: Kao dio tekućeg rada Programa Puteva svile na boljem razumijevanju bogate istorije i zajedničkog nasljeđa i duha Puteva svile, UNESCO je, uz podršku Nacionalne komisije Narodne

Republike Kine za UNESCO, pokrenuo „Odobrenje za Omladinsko Istraživanje Puteva svile“ 2021. godine u okviru Sektora društvenih i humanističkih nauka. Kandidati za grantove su pozvani da se pozabave oblastima akademskih studija koje se odnose na zajedničko nasljeđe i mnogobrojne identitete Puteva svile, kao i njegovu unutrašnju raznolikost i potencijal u savremenim društvima za kreativnost, interkulturalni dijalog, društvenu stabilnost, regionalnu i međunarodnu saradnju, i na kraju održivi mir i razvoj. Ova inicijativa nagradiće 12 istraživačkih grantova mladima sa najboljim prijedlozima. Prihvatljiv je širok spektar istraživačkih oblasti, uključujući multidisciplinarne i multidimenzionalne prijedloge koji nisu ograničeni na jedan specifičan region ili hronologiju. Predloženo istraživanje može pokriti jednu ili nekoliko tema povezanih sa zajedničkim nasljeđem Puteva svile uključujući, ali ne ograničavajući se na:

- Nauka i tehnologija i tradicionalno znanje
- Religija i duhovnost
- Jezik i književnost
- Umjetnost i muzika
- Tradicionalni sportovi i igre
- Ekonomija i trgovina
- Nasljeđe Puteva svile i savremeni problemi i pitanja

Predloženo istraživanje mora da se fokusira na rezultate kulturnih interakcija i razmjene, i u okviru date oblasti mora da prikaže konkretne rezultirajuće elemente, bilo da su materijalni ili nematerijalni, koji se mogu identifikovati u dvije ili više kultura duž Puteva svile i šire.

Panel će dodijeliti 12 odobrenja od \$10,000 po istraživačkom projektu na osnovu prednosti predloženog istraživanja i njegovog potencijalnog doprinosa unapređenju razumijevanja interakcija i razmene koje se odvijaju širom Puteva svile i konkretnih elemenata koji iz njih proističu. Grant će biti dodeljen u dvije odvojene rate. Dobitnici će biti objavljeni u oktobru 2023. godine procesom evaluacije rađenog od strane naučnog panela sastavljenog od renomiranih međunarodnih akademika. Predloženo istraživanje može da sprovede pojedinačni istraživač ili može biti dio grupnog ili kolaborativnog projekta, međutim samo jedan grant će biti dodijeljen po istraživačkom projektu.

USLOVI: Pravo na prijavu imaju svi postdiplomski istraživači iz svih zemalja starosti od 35 i mlađi u vrijeme podnošenja prijave.

NAČIN PRIJAVE: Kako biste se prijavili potrebno je posjetiti sajt:
<https://en.unesco.org/silkroad/youthgrant-applicant-guidelines>

ROK ZA PRIJAVU: 31.05.2023.

Detaljnije na: <https://en.unesco.org/silkroad/youthgrant>

2. Дјеца уче са Невид Театром широм Републике Српске од 31. маја до 15. јуна



Дјеца уче са Невид Театром (Илустрација: Марко Дукић / Невид Театар)

Приказивањем анимираног позоришног бонтонa за дјецу и одрасле, аутора и редитеља Марка Дукића, у Црквеном дому у Калиновику, 31. маја са почетком у 12 часова и 55 минута, Невид Театар наставља овогодишњу реализацију образовног програма „Дјеца уче са Невид Театром“.

Осим приказивање [анимираног позоришног бонтонa за дјецу и одрасле](#) у продукцији Невид Театра, образовни програм обухвата и извођења интерактивне образовне представе „[Чудесни континенти](#)“ која је намијењена за узраст од три до 10 година, као и реализацију едукативног квиза о правилима лијепог понашања у позоришту, континентима и животу на Земљи. Улаз на све догађаје је бесплатан, а програм у свакој општини почиње у 12 часова и 55 минута.



У оквиру програма биће промовисан и дигитални садржај Невид Театра и то: илустрована књига о правилној исхрани [„Здрави забавник Невид Театра“](#), инструктивно-едукативне методе у раду са дјецом [„Образовање кроз игру“](#), [илустрована књига бајки и басни за дјецу](#), [аудио-књига](#), као и верзија [аудио-књиге за дјецу са потешкоћама у развоју](#).

Осим у Калиновику, образовни програм имаће прилику да погледају и малишани у **Чајничу** (ЈУ Дом културе „Филип Вишњић“, 1. јуна), **Рогатици** (ЈУ Центар за културу и спорт „Раденко Мишевић“, 2. јуна), **Власеници** (ЈУ „Културни центар“, 12. јуна), **Шековићима** (ЈУ Дом културе „Владика Николај“, 13. јуна), **Осмацима** (Дом културе, 14. јуна) и **Петрову** (ЈУ „Културно-туристички и спортски центар“, 15. јуна).

У оквиру пројекта, ове године гостовали смо и у Доњем Жабару (Спортска дворана, 3. априла), Пелагићеву (Административно-културни центар, 4. априла) и Шамцу (ЈУ „Центар за културу“ Шамац, 5. априла), а до краја године посјетићемо и осам бањалучких приградских насеља.

Овај програм представља саставни дио стратешког пројекта Невид Театра (2017–2023), чији је свеукупни циљ развој и едукација публике од најранијег дјетињства, као и унапређење знања стручног кадра о вриједностима и важности цјеложивотног учења и интерактивног образовања у 30 општина Републике Српске и 20 бањалучких приградских насеља.

Од децембра 2017. године до сада имплементиран је у 20 општина Републике Српске, као и у 12 бањалучких приградских насеља. Осим 32 извођења представе, организовано је и 25 предавања на тему „Утицај интерактивних представа и драмских радионица у развоју физичких, когнитивних и социјалних вјештина код дјеце“, као и 50 драмских радионица за дјецу. У програму је учествовало готово 4.000 малишана, као и 300 учитеља, наставника и педагога.

Пројекат суфинансирају Министарство просвјете и културе Републике Српске и Град Бањалука.

3. Povećaj svoje šanse zapošljivosti uz Coca-Colinu podršku mladima BiH



Kursevi ličnih i poslovnih vještina pripremljeni su u sklopu programa „Coca-Colina podrška mladima u BiH“, a namijenjeni su svim mladim osobama koje žele usvojiti dodatna znanja i vještine.

[Coca-Colina podrška mladima u BiH](#) jedinstven je edukativni program kojim od 2017. godine Coca-Cola HBC B-H pomaže u osnaživanju i poboljšanju zapošljivosti mladih ljudi širom Bosne i Hercegovine.

Kurs se sastoji od tri modula:

- Upravljanje vremenom
- Mentalno zdravlje
- Poslovno pregovaranje

Predavači su:

Prof. dr. Ivana Zečević

Nikola Kužet

Kurseve možeš pogledati u periodu koji ti najviše odgovara, a dijelove i lekcije možeš pogledati i više puta. Preporučujemo ti da tokom kurseva zapisuješ najvažnije stavke.

Uradi vježbe i testove koji se nude u okviru predavanja, sigurno će ti poslužiti.

Ako odslušaš sva tri modula, na kraju možeš preuzeti i potvrdu o učešću. Potvrda se automatski generira nakon što sve videolekcije budu označene kao „completed“, te nakon klika na dugme „finish course“.

Želimo ti sretno učenje!

PRIJAVI SE:

<https://academy.leapsummit.com/courses/coca-colina-podrska-mladima-bosna-i-hercegovina/>

Izvor mladibl.com

4. Euro-mediteransko književno takmičenje mladih 2023 – “More riječi” (A sea of words)

Pozivamo mlade iz Europe i Mediterana da napišu priču o uticaju vještačke inteligencije u našim društvima, posebno naglašavajući dileme u pogledu:

Etičke vrijednosti

Kako promovirati talenat i kreativnost

Izbjegavanje eksploatacije i manipulacije.

Učestvujte Napišite i pošaljite svoju kratku priču.

Rok: 25. jun 2023.

Autori 10 najboljih tekstova uživaće u trodnevnom boravku u Barceloni od 9. novembra 2023. kako bi učestvovali u ceremoniji dodjele nagrada, kreativnim radionicama i kulturnim razmjenama.

Njihovi radovi će takođe biti objavljeni u knjizi.

USLOVI:

Učešće je otvoreno za mlade između 18 i 30 godina starosti.

Tekst ne može premašiti maksimalnu dužinu od 2500 riječi.

Dokument se mora poslati u Word formatu na sljedeću adresu: concurso@iemed.org.

Poruka mora sadržavati naslov rada uz lične podatke autora: ime, broj telefona, poštansku adresu, email adresu i datum rođenja.

Konkurs je otvoren za mlade ljude sa državljanstvom i prebivalištem iz jedne od 43 zemlje evro-mediteranskog područja (dakle, i BiH)

Priča mora biti originalna i može biti napisana na bilo kom od službenih jezika 43 države evro-mediteranskog prostora.

Bit će prihvaćen samo jedan rad po autoru.

Izvor: ALF BiH



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba**

Mjesečni bilten uređuje Omladinski resursni centar - ORC Tuzla

Urednik Biltena:

Minela Dohranović

Prevod Biltena na

engleski: **Adnan Karamujić**

WEB stranica Mreže:

www.orctuzla.ba

Mejling lista Mreže:

omladina@orctuzla.ba

Webmaster:

anicic.dev@gmail.com

ISSN (BHS Varijanta): 2831 – 0845

ISSN (Engleski): 2831 0853